



Á ALCALDÍA DO CONCELLO DE FERROL

Moción do Grupo Municipal de EU para expresar a solidariedade co xuíz Baltasar Garzón

Yolanda Díaz Pérez, Voceira do Grupo Municipal de Esquerda Unida, de conformidade co disposto no artigo 104 do Regulamento Orgánico do Concello de Ferrol, e co artigo 97.2 do vixente Regulamento de organización, funcionamento e réxime xurídico das entidades locais, presenta a seguinte Moción ao obxecto de ser incluída na orde do día do Pleno ordinario e debatida no mesmo coa seguinte,

EXPOSICIÓN DE MOTIVOS:

Moitas cidadás e cidadáns estamos a seguir cunha extraordinaria preocupación a situación que se está a producir en relación coa actuación do Tribunal Supremo, con motivo das acusacións por prevaricación contra o xuíz Baltasar Garzón.

Á marxe doutras consideracións sobre o traballo do xuíz Baltasar Garzón, semella sorprendente que se lle abra un expediente de suspensión en base a admisión a trámite dunha querela criminal interposta contra o mesmo pola súa actuación xudicial para tentar investigar os crimes imprescritibles do franquismo, e outra dirixida a deixar sen valor as probas obtidas na investigación do caso Gürtel.

Produce indignación e bochorno comprobar como en troques de animar a persecución dos delitos cometidos durante o franquismo contra moitas e moitos cidadáns do noso país e do Estado, se persiga a quen tenta contribuír a facer xustiza, no increíble salto que supón amparar aos verdugos e abandonar unha vez máis ás vítimas.

Semella igualmente sorprendente a pretensión de, mediante querelas criminais constantes, minar o esforzo xudicial por tentar esclarecer tramas de corrupción como o chamado caso Gürtel, tentando amparar as prácticas corruptas, limitando a posibilidade de investigación. De se continuar a tramitación contra o xuíz Garzón, se estaría a pór en perigo a investigación do caso Gürtel e a sementar un camiño de impunidade para os actualmente implicados.

Estas actuacións xudiciais comezadas polos ámbitos da dereita e a extrema dereita do noso país, autores de querelas criminais admitidas a trámite, supoñen un pulso inaceptable á democracia e á xustiza, que non debe ser amparado polos órganos de goberno dos xuíces.

O que está a ocorrer no presente caso non é só unha actuación contra un xuíz que, no exercicio das súas funcións, comeza actuacións xudiciais no ámbito da súa competencia e no marco das atribucións que ten encomendadas, senón que o que se traslada á cidadanía é que neste Estado hai asuntos e persoas que son intocables e que actuar contra eles supón, aínda hoxe, atraerse graves consecuencias.

O noso Grupo Municipal coida que a campaña de acoso e derrubo que está a executar a extrema dereita e a dereita é realmente inadmisibile en democracia, tenta minar a independencia xudicial e pretende enciar unha mensaxe ao conxunto da cidadanía: que existen límites non escritos para a acción da xustiza e a democracia.

Non é estraño que demócratas de todo o mundo e diferentes organizacións xudiciais do Estado e internacionais de dereitos humanos expresen o seu escándalo perante esta campaña, e amosen a súa solidariedade co xuíz Baltasar Garzón.

O nos Grupo Municipal considera que namentras non se resolvan os procedementos xudiciais contra o xuíz Garzón, este non debe ser suspendido nas súas funcións, nen se deben continuar a tomar decisións que poñan en cuestión a imparcialidade do órgano de goberno dos xuíces e do propio Tribunal Supremo.

Xa que logo, o Grupo Municipal de Esquerda Unida propón ao Pleno do concello de Ferrol a seguinte proposta de ACORDOS:

1º.- Amosar a solidariedade e apoio ao xuíz Baltasar Garzón, diante a campaña de acoso e derrubo ao que está a ser sometido.

2º.- Esixir ao Consello Xeral do Poder Xudicial que actúe con absoluta imparcialidade no presente asunto, sen proceder a tomar decisións de suspensión das funcións do xuíz Baltasar Garzón, namentras non se produzan resolucións xudiciais en relación cos feitos que se lle imputan.

3º.- Esixir que as vítimas do franquismo que instaron o comezo do procedemento xudicial aberto polos crimes da ditadura franquista poidan ser parte no procedemento xudicial aberto contra o xuíz Baltasar Garzón polo Tribunal Supremo.

4º.- Garantir que os procedementos por corrupción, investigados até o momento polo xuíz Garzón continúen e amplíen o ámbito de investigación ao obxecto de esclarecer as responsabilidades penais a que haxa lugar.

5º.- Dar traslado da seguinte proposta de acordos á Presidencia do Consello Xeral do Poder Xudicial.

Ferrol, 11 de marzo de 2010.

Asdo. Yolanda Díaz Pérez

Voceira do Grupo Municipal de EU